

均縣戴金鏐修著

最近世界外交史

上冊

最近世

江苏工业学院图书馆
藏书章

外交史

凡例

一本史自一九一四年五年大戰起 一九二六年（民國十五年）止凡國際間重大事件重要條約無不備載

一本史第一編五年大戰用紀事本末體敘述則一年中各地戰況不易明晰故用編年體將每年戰情區劃清楚同盟方面勝敗之由一望瞭然

一歐戰起後日本即乘機謀我山東及關東三省以最後通牒迫我承認該國所提之二十一條我國迫於情勢遂與訂一九一五年條約及換文嗣經我國迭次抗爭僅得撤銷數項其重要部分迄今尚未解決此事關於中國前途至爲重大故本史第一編第二編第五編第六編特將此事經過情形詳加敘述以供憂時者之考究

一大戰之後新國崛起託治紛紜歐亞非三洲疆域皆經變更南北太平洋中各島亦俱改觀本史因於第二編詳爲敘述以爲談地理者之一助

一國際聯合會盟約以增進國際協同行事並保持其和平與安寧爲目的有永久之性質其與國際間之關係尤爲重大故國際聯合會第四屆大會曾議決通知各會員國設法使世界青年咸

曉國際聯合會之重要及盟約之意義第五屆第六屆大會復議決通知各會員國認真辦理會經中國內務部教育部分別通告京內外各機關及中等以上各學校認真研究在案本史第三編因將該約逐條詳加詮釋更援據每年要案以資參證其中業經修正之條文現已發生效力及尙未發生效力者均分別標明俾便考究

一 勞動問題乃近年國際間最大問題本史因於第四編詳述解決方法以爲談社會政策者之一助

一 五年大戰後最易誘起世界第二次大戰者爲太平洋及遠東問題經華盛頓會議後皆次第解決其中關於中國者十居六七本史第五編特爲詳述顛末用供考究

一 近年國際間重要事件層出不窮關於中國者尤日加多本史第五編特分章詳述以備留心時局者取材

一 近年國際事件頭緒紛繁東鱗西爪破費蒐求紕繆疏漏在所難免博雅君子幸糾正焉

中華民國十五年（一九二六年）九月鼎峙氏識

最近世界外交史

均縣戴鑫修著

第一編 五年大戰

第一章 序言

自來談兵者。動謂勝敗無常。豈果無常哉。順天者昌。逆天者亡。伊古來不易之定論也。天固不可知。合乎理自應乎天。千古成敗之由。恃勢者無不亡。恃理者無不興。天下無常勝之勢。而有常勝之理。據常勝之理。必能立於不敗之地。其勝也自有如操左券者。嘗見雄藩跋扈。爭地爭城。殺人妻。孤人子。獨人父母。橫行無忌。以爲天下莫我強也。忽有人心景附者出而撻伐之。或聞風聲而倒戈。或致壺漿以迎師。江河不足限戎馬之足。草木皆欲效斧鉞之威。振臂一呼。大亂立平。是常勝之道。固在此不在彼也。德皇威廉第二當大戰之初。一鼓而深入法境。未幾而塞王播遷。未幾而門王蒙塵。東鄰強俄。竟爲城下之盟。駸駸乎有囊括四海。併吞八荒之勢。其意氣之盛。可謂壯哉。祇以潛艇肆虐。商船多被擊沉。美國因其有背人道。迭次嚴重抗議。德人終不反省。美遂毅然加入戰團。用圖縮短戰期。協約國得此大助。軍威益振。德自攻凡爾登失敗後。所有精兵喪失殆盡。西戰場陸續補充者。多係新練之卒。是時德之兵力。已遠不及聯軍。故一攻再攻。至於五攻。皆不得逞。保土奧三國如夢初覺。知武力之不可恃。於一九一八年皆相繼脫盟。其國民亦知當局所抱軍國主義之難實行。幾爾水兵一經倡亂。全國蠶起響應。睥睨一世之梟雄。卒至託庇他人宇下。作出亡之逋客。方其盛也。舉歐陸之強國莫能與之爭。及其敗也。少數黨人困之。而國破家亡。爲天下笑。專恃武力之不足以圖存。章章明矣。稽古大戰。亦曾屢見。十字軍之役。出師凡七次。禍延百七十餘年。英法繼水之戰。禍延百年。新舊兩教。

之戰。垂三十年。普奧復仇之戰。爲時七年。俄土克里米之戰。爲時三年。美國南北之戰。爲時五年。然皆屬於局部之爭。未有如此次波及全球者。也是役未曾牽入漩渦者。在歐陸僅瑞典挪威丹麥荷蘭瑞士西班牙六國。在美洲僅有阿根廷哥倫比亞墨西哥巴拉圭薩瓦多委內瑞拉六國。若秘魯若烏拉圭若智利若三多明哥亦皆與之絕交焉。全球參戰者。在三十國以上。德之所以爲衆矢之的者。蓋其專恃強橫。重違公理。自爲人所不容耳。書曰天視自我民視。天聽自我民聽。人心之向背。卽勝敗所由分。逆天而行。適足自速其亡也。德皇雄才大略。固欲雄飛全球者也。其經營巴格達鐵路。卽爲兼併歐亞。實行其大日耳曼主義也。其孜孜不倦。擴張海軍。卽欲奪英國海王之號。實行其世界政策。作五洲之共主也。既與法俄交惡。復與英國爭雄。大戰之不能倖免。有識者早已料及矣。而塞拉吉孚暗殺案。竟爲最有力之導火線。霹靂一聲。全球震動。屍填巨港之岸。血滿五洲之窟。天地爲愁。草木淒悲。三百萬頭顱。五百億金錢。僅博得一片哭聲。滿目慘景。數十年之希冀。終被公理遏其前途。世之迷信武力者。亦可以知反矣。

第二章 大戰之遠因

第一節 三帝同盟

當一八七〇年普法之戰。法國大敗。次年議和。會將亞爾沙士洛林二州。割歸普國。並賠款五千兆佛郎。法之臥薪嘗膽。昕夕未亡。圖報之念。俄羅斯位於德意志東方。若法聯俄以攻德後。則德腹背受敵。其國危矣。德相俾斯麥有鑒於此。因謀親俄以孤法勢。俾相知俄素懷侵略巴爾幹半島之野心。乃以甘言媚俄。願扶助其在巴爾幹半島之勢力。又偵知俄國適有虛無黨之警。更以聯合制止革命黨之言進。俄帝得此大援。因卽躬詣柏林。是時奧帝因有內憂外患。欲與德國蠲除普奧戰爭舊怨。藉以伸張勢力。已先至柏林。三帝相會。遂同盟焉。時一八七二年九月五日也。其盟約主旨。(一)三國和衷處置巴爾幹半島。(二)嚴禁革

命黨軌外運動。(三)維持最近議定歐洲之領土。盟後數年有柏林之會。是時奧具野心。德蓄惡意。將土許俄之權利。大加削減。俄怨甚。一八八五年東羅馬尼亞及布魯額利亞叛俄。德奧又坐視不救。俄怨更深。三帝同盟。因是解體。此俄與德奧生嫌之漸也。

第二節 柏林會議

俄居歐洲北方。頗乏不凍良港。自俄帝大彼得以來。每思南下突出地中海。稱霸於歐陸。惟南出地中海之路。則土耳其所領君士坦丁堡橫扼其吭。欲得此地。必須謀土。初與土戰。爲英普奧諸國聯軍所困。大敗於克里米。復於一八七七年再與土戰。大敗土軍。迫土結聖師得法納條約。土國削地過多。奧恐不利於己。頗反對之。英恐俄突出地中海。奪其海上霸權。反對更力。幾至用兵。德相俾斯麥調處其間。因於一八七八年開會柏林。俾相自爲議長。竭力袒英助奧。俄所得於土者。被柏林條約削去太平。依此條約之規定。則波士里赫爾塞哥維勒二州之管理權屬諸奧國。此二州在中古時曾爲塞爾維亞之一部。居民多係塞種。該地既脫土之羈絆。復受奧之壓制。此塞人所以昕夕不忘者也。五年大戰。此約實種禍胎。

第二節 三國同盟

當一八七七年俄土之役。俄勝土。割地以和。奧大地恐俄得志於巴爾幹。不利於己。頗持反對態度。英吉利恐其不利於歐洲。反對更力。德相俾斯麥調停其間。因於一八七八年開會柏林。俾相自爲議長。極力袒英助奧。以挫俄人南下之勢。俄因此銜德次骨。德懼俄聯法圖己。乃力謀聯奧以求抵制。奧與普曾迭次戰爭。本爲世仇。惟俄果南下。則奧危矣。不得不捐嫌修好。防俄攻擊。故德奧同盟遂於一八七九年一月七日成立。其盟約如左。

第一條 同盟國之一方如受俄國攻擊時。他一方應以所有兵力援助之。不經兩國同意。不得媾和。

第二條 同盟國之一方如受俄國以外之他國攻擊時。他一方須守善意之中立。不得援助同盟之敵國。但同盟之敵國或得俄國之扶助。俄國或與同盟之敵國並舉。他一方應遵照第一條規定。立時援助。媾和時亦同。

第三條 本盟約應由雙方嚴守秘密。非經同意。不得通告第三國。

上項盟約。即所謂攻守同盟條款。五年大戰。此約實爲厲階。德奧同盟後。義大利於一八八二年加入。是爲三國同盟。先是奧大利會據有義國土地。義人嘗受壓制。及一八六〇年義大利統一後。尚有北部之特朗丁諾 Trentino 及亞得里亞海東岸的尼亞斯得 Triest 伊斯特尼亞 Istria 波刺 Pola 歸奧國占領。義人嘗名的尼亞斯得各地爲「未復地」。是義奧亦爲世仇。義與法同屬拉丁族。其脫離奧國羈絆成爲獨立國。又頗賴法帝拿破崙三世扶助之力。其親法必矣。德相俾斯麥因用離間手段。破壞二國之交。突尼斯 Tunis 在非洲北岸。與義大利之西治里島相對。義人居留該地者頗多。該地原爲土耳其領土。義人久欲取之。惟與法屬阿爾及爾相鄰。法亦垂涎焉。俾相利用此地以離間義法。因德意法國占領突尼斯。法中其計。果於一八八一年收爲保護國。義人恨法次骨。輿論至爲激昂。俾相知計之既售。乃使奧誘義加入同盟。義王覺欲保持地中海權利。不可不結同盟國以與法抗。因於是年九月初。奧明年朝德。一八八三年一月遂加入德奧同盟焉。義伯爵尼格拉有言。「義奧不爲同盟。卽爲敵國。」義既與法交惡。若不加入同盟。則勢孤矣。是義之加入同盟。乃係被迫。實非本願。宜其貌合神離。可恃而不可恃也。

第四節 一國同盟

德奧義三國同盟既成。法頗憂之。急思聯俄以壯聲勢。惟法俄政體不同。俄畏虛無黨如蛇蝎。而虛無黨頗受法國自由主義之影響。法之聯俄。屢議不成。其癥結在斯。雖然。俄如不孤斯已耳。果至孤立之時。不聯法卽難圖存。柏林會議時。俄曾受德相俾斯

麥脅制。俄德國交終未至於破裂者。實由俄帝亞力山大第二與德帝威廉第一私交維繫之力也。俄德感情既未大傷。且有德俄密約之關係。加之俾相幹旋於其間。故終威廉第一之世。俄德國交毫無齟齬。及一八八八年威廉第二繼位。俾相被斥去。俾氏政策遂不見用。俄德密約適於一八九〇年滿期。德皇拒絕續訂。俄不得已。乃中止巴爾幹之經營。竭力擴張遠東之勢力。以圖不凍之良港。惟修築西伯利亞鐵路需費過鉅。不便求助於德。更不便求助於英。因德已生嫌。爲所銜恨。英曾迭阻俄之南下。亦其素所切齒者。祇有向法募集之一途。俄固法向欲結爲與國者。一旦求助。自必欣然允諾。故不數日竟超過原所募集之債額三倍。由是俄法之交漸篤。未幾法軍鑑往訪俄之克郎斯得港。俄軍艦亦往訪法之土倫港。互通使節。用資聯絡。俄法同盟遂於一八九一年成立。其盟約要點。卽兩同盟國之一方受攻擊時。他一方應出陸海軍援助之。非經兩同盟國同意。不得媾和。五年大戰。亦此盟約爲之厲階也。

第五節 亞洛二州之割讓

當一八七〇年法蘭西與普魯士開釁。法軍大敗。明年普軍進破巴黎。和議成。法賠五千兆佛郎。並將亞爾沙士州及洛林州之一半割讓於普。此二州在軍事上有關係重大之要塞。在生計上有產鐵最富之鑛區。故自割讓後。數十年間。法人未嘗忘恢復之念。五年大戰。此二州實爲主要之動機也。

第六節 摩洛哥問題

摩洛哥居於非洲之西北岸。與英屬直布羅陀相對。中爲直布羅陀海峽。地勢極爲重要。一九〇四年德之大日耳曼黨魁宣言德國宜取此地。移殖其過庶人民。法蘭西素在摩地壘斷權利。一九〇五年德帝威廉第二因親至摩商埠丹吉爾。且言願爲摩地土酋良友。扶持其獨立。摩洛哥問題由此發生。一九〇六年各國因開會於西班牙之亞爾支西來（Algésiras）。定摩地

爲國際公地。一國不得私據。更不得收爲保護地。一九一一年四月法乘摩都費斯暴動。派兵前往鎮壓。此直以保護國目之矣。六月一日德因派軍艦至摩西岸亞加的爾港示威。求法償以剛果由海至桑加河一帶之地。法人嚴拒。英宣言曰。如德法開釁。英必助法。德人大懼。因於十一月四日締結德法條約。德承認法在摩地之管理權。法割剛果屬地大半於德。掀天大浪。卒獲平息。惟兩國輿論皆力攻其政府處置失當。德法惡感。愈結愈深。德人此次交涉失敗。純係英人作梗。德英感情。亦歸惡化。五年大戰。其所由來者漸矣。

第七節 波赫二州之合併

塞爾維亞受土耳其之羈絆者數百年。至柏林條約成立。始得爲獨立國。自獨立後。日倡大塞爾維亞主義。期恢復其中古時之版圖。波士里亞赫爾塞哥維勒二州。在中古時原爲塞國之一部。非惟有歷史之關係。且二州之民族。更多係塞種。故塞人之欲恢復二州。朝夕不能忘也。此二州依柏林條約規定。雖歸奧國管理。而其主權則仍係屬諸土國。由土收回。比較稍易。詎意奧於一九〇八年十月五日竟以合併二州通告列國。塞人此時不啻當頭棒喝。不得不聯絡英法俄三國。出而相抗。祇以遼東之役。俄新受挫。不堪再戰。英法二國因其無關於己。亦不肯開釁。德又致書俄皇以助奧之言相恐喝。塞不得已。惟有忍辱承認而已。塞拉吉拿 *Serajevo* 暗殺之禍機。實潛伏於此矣。

第八節 英法英俄之關係

英法向屬姻親。兩國百年戰爭後。遂相仇視。觀於蘇彝士運河之競爭。可見一斑矣。及英皇愛德華七世 *Adward VII* 卽位。一變向日仇視態度。力謀與法交親。一九〇三年十月。二國會締結公斷條約。調和爭議。又將多年懸案。悉行解決。英法協約。遂於一九〇四年成立。俄之對於巴爾幹。曾日夕經營而不能忘者。英恐其突出地中海奪去海上霸權。嘗屢尼其南下之路。二國

交惡。由來已久。惟德之巴格達鐵路若成。則歐亞交通。將闢一新捷徑。英在歐洲之勢力。當必銳減。俄之南下。其害尙淺。德之雄飛。爲患較烈。故遂變其制俄之心。而爲聯俄之計。巴格達鐵路在俄亦有切膚之患。此鐵路一旦告成。俄人絕其南下之路。將永錮於雪地冰天之中。英國海軍冠絕一時。欲制德。惟有聯英。俄英二國。既有必須交驩之勢。英俄協約。因於一九〇八年成立。自是三國協約。與三國同盟成對峙之局。此奧塞之爭。所以因一髮而牽全身。致演成五年大戰之慘劇。

第九節 義大利與英法俄三國之關係

義與英友誼素篤。義立國於地中海岸。與英國有最密切之關係。故義英二國之協約。於一九〇四年成立。英法協約。亦於是年成立。義欲鞏固地中海之勢力。自不能屏於英法協約之外。英法義三國協約。因於一九〇六年成立。法之占領突尼斯。義本怒甚。嗣因募集公債。法頗盡力。由是漸相接近。此三國協約。所以卒底於成。一八九六年阿伯西尼亞之役。義人大敗。銜俄甚。嗣因義王伊瑪努第三與俄修好。國交始篤。二國維持巴爾幹均勢之密約。因於一九〇八年成立。義既與英法俄三國彼此親善。奧塞覺起。無怪其始中立而繼參戰也。

第十節 德國近東之經營

德國人口蕃殖之速率。日見增加。必須開闢新土以資容納。環顧歐陸。毫無插足之地。惟有病夫之土耳其。尙可以圖。德皇因於一八八八年一八九八年兩次造謁土皇於君堡。用資聯絡。並遣將校赴土。訓練該國軍隊。由是德土國交日臻親密。遂取得巴格達鐵路 Berlin-to-Bagdad Railway 之敷設權。此鐵路起於德國北海岸商埠漢堡 (Hamburg) 經德都柏林及撒遜之的乃士敦 (Dresden) 波希米之巴拉克 (Prague [今亦哈國都]) 奧都維也納 匈都不達伯息 塞都別爾克勒得 (Belgrade [今塞爾維亞克魯特斯拉文尼國都]) 保都索非亞 (Sophia) 土都君士坦丁堡 渡波斯 頗洛斯海峽 由亞洲

土耳其西北境之士格得里 Scutari 經美索不達米亞平原沿幼發拉底斯 Euphrates 及底格里斯 Tigris 兩河谷而下。越白格達城 Bagdad 抵波斯灣頭之哥溫埠 (Koweit) 縱貫歐亞兩大陸。綿亘八千九百餘軒。德自得此鐵路敷設權後。竭力經營。限於一九一七年竣工。惟此鐵路一旦告成。則永阻俄人南下之路。俄自不得不求破壞之方。故常鼓動巴爾幹風雲。使土國不能存立。土自巴爾幹兩次戰爭後。疆域日蹙。巴格達路線之中段。土已失其管理權。德因此銜俄次骨。所以與塞覺開。而德俄即時捲入漩渦也。

第十一節 巴爾幹問題

巴爾幹半島。位於歐洲之南。突出地中海。其東境越波斯頗洛斯及他達奈爾兩海峽。即與亞洲接壤。此半島之地勢。既關重要。種族宗教。又極龐雜。故喧沓紛擾。迄無寧歲。五年大戰。此半島實爲厲階。土耳其於一四五二年滅東羅馬後。即奄有此半島。地理家所稱爲歐洲土耳其是也。土政不綱。歐屬各地。漸次攜貳。塞爾維亞於一八一七年建國。希臘於一八三〇年獨立。羅馬尼亞亦於一八五九年建國。塞羅二國及門的內哥羅之獨立。並經一八七八年之柏林條約承認。波士里亞及赫爾塞哥維勒二洲。亦經柏林條約割歸與國管理。保加尼亞更於一九〇八年獨立。至是土在歐洲領地。喪失幾盡。土境日蹙。尙不知自奮。遂啟各獨立國覬覦之心。一九一二年保希塞門四國。冀分割土國歐洲之地。遂結同盟。致演成巴爾幹第一次之戰爭。此次戰爭。巴爾幹諸小國竟獲全勝。土國迫於莫已。乃請歐洲各大國出任調停。遂於一九一三年五月開會倫敦。由奧主謀。將塞國所佔亞得里亞海沿岸之地。建一愛爾巴尼亞國。塞國西向出海之路。既被隔絕。因求保國留馬基頓一部。以出愛琴海。又被拒絕。二國惡感遂深。奧深恐塞之進窺希臘。南出愛琴海。故誘保使附於已。保因於一九一三年六月二十九日襲擊塞軍。巴爾幹第二次之戰爭以起。保國卒未得勝。土人乘機恢復其一部之地。羅馬尼亞復占據其都城索非亞。保人四面受敵。經俄調停。遂於維都

布加勒士會議。八月十日布加勒士條約成立。將保得於土之西答臘斯割歸塞國。將西里特里割於羅國。將喀瓦拉及馬基頓之大部割於希。至亞得里安堡則復歸於土。第一次戰爭後。保勢頗盛。自布加勒士條約成立。凡得於土國之地。完全喪失。故深怨同族之俄。而與德交親。塞得保地勢益張。雖不利於奧。德與義三國因於九月通牒塞國。令立時退還所占保國之地。塞不另答德與義。而徧報六國。表明係自行退還所得保國之地。非爲威屈。塞因奧合併波士里亞。赫爾塞哥維勒二州。已銜奧次骨。復經此次迫脅。積怨益深。此所以用暗殺手段。求得主謀之斐迪南而甘心焉。塞人屬斯拉夫族。俄曾以扶持同族之人相號召。塞果有事。俄自不能不盡扶持之力。與塞釁起。由一髮而牽全身。職是故耳。

第三章 大戰之近因

第一節 塞拉吉孚暗殺案

塞爾維亞位於巴爾幹半島之北部。向無出海之路。巴爾幹第二次戰爭後。始取得西方亞得里亞海沿岸之地。其夢寐不忘之海口。一旦獲得。幸何如之。詎意倫敦會議。忽由奧太子斐迪南主謀。將該地建一愛爾巴尼亞國。入口之物。復被奪去。銜恨可知。斐迪南天姿英邁。富有經驗。如果正位。其對於素所嫉視之塞。自必愈加壓迫。使生朝不保夕之慮。故塞國有志之士。組織暗殺機關。圖謀除此大敵。以絕後患。塞拉吉孚 *Serajevo* 係波士尼亞州城。一九一四年六月二十八日斐迪南及其妃巡視波士尼亞。盛式以入塞拉吉孚城。有人投炸彈擊之。未中。傷左右。兇犯當場就縛。未幾。斐迪南乘車赴醫院慰問傷者。途中復被十九齡之塞國學生蒲尼的蒲 *Prinzip* 擊中咽喉。妃亦被擊中。先後斃命。兇犯亦當場就縛。訊問結果。始悉塞國組織暗殺機關。密謀剪鋤太子。塞國文武官吏。亦皆在內。於是掀天大波。即由此起。

第二節 奧國致塞國之通牒

自塞拉吉字暗殺案發生後。奧國各報紙攻擊塞國。不遺餘力。民情尤爲激昂。塞政府以新經大戰之後。滿目瘡痍。不敢輕啟釁端。乃致牒奧國。力爲別白。並聲明嚴禁塞人排奧運動。當時塞人對於政府並力加攻擊。謂其不應示弱。奧國民情激昂。雖達極點。而政府則鎮靜如常。塞政府方幸可歸寧息。詎意奧國陰與德國密謀破塞。潛調軍隊。忽於一九一四年七月二十三日下午六時致塞國通牒。限四十八時內答覆。詞氣異常激烈。其文如左。

案照一九〇九年三月三十一日塞國駐奧公使奉其本國政府訓令。曾向奧匈國政府宣言云。塞政府承認波士尼亞赫爾塞哥維勒二州合併之事。對於塞國並無損害。自今以後。改變對奧之政策。以結兩國交親。然觀於六月二十八日之慘事。知塞仍包藏禍心。非惟不遵守宣言。且不制止暴舉。寬容仇奧秘密機關及與謀之官吏。表彰不潔學說。獎誘塞民仇視奧匈國。今應以明文嚴禁塞國仇視奧匈。爲鄭重此事起見。須於本年七月二十六日官報第一頁。將左列條件布告全國。

- (一) 塞國痛恨前次各種仇視奧匈。破壞其國領土之舉動。今應嚴行禁止。
- (二) 塞國深悔六月二十八日之慘事。塞國官吏竟亦與謀。致違一九〇九年三月三十一日塞國政府保全兩國親善之宣言。
- (三) 塞國政府爲反對本國人民干預奧匈國各地居民事務起見。應明白宣示此後凡塞國官吏及人民。如有再犯此罪者。當盡法懲處。一面由政府嚴加防範。

右列各款。應同時登諸軍務官報。並布告全國軍隊。塞國政府應全變其近時對奧匈國政策。承認左列十款。

- (一) 焚毀仇視奧匈國希圖破壞其領土之各種書籍。
- (二) 立時解散國民共厲協會。其他仇視奧匈團體。亦應一律禁止。並預防以後同此性質之團體發生。

(三)凡教科書中有足啟仇視奧匈之虞者。應立即刪改。

(四)凡參加此次仇視奧匈之文武官吏。由奧匈指名通告。一概罷免。

(五)奧匈政府須派員在塞國設立機關。會同塞國官吏防止圖謀破壞奧匈國領土之各種舉動。

(六)參加六月二十八日暗殺罪犯。應由奧匈政府派員會同塞國司法官審判。

(七)立時拘捕暗殺案內嫌疑犯隊官 Tankosik 文官 Ciganovic。

(八)嚴誡邊官切實查禁軍械炸藥出境。將縱容塞拉吉孚暗殺犯出境之邊官。免職懲辦。

(九)六月二十八日慘事發生後。塞國內外大員鼓吹反抗奧匈國政府者。應嚴加申斥。

(十)上列各款。塞國政府擬若何實行。應從速答復。至遲不得過六月二十五日下午五時。

凡通牒限定時間答覆者。尋常皆名之爲最後通牒。奧既抱攻塞之決心。故通牒中之語氣。直以屬國待塞。不留餘地。英國見此通牒。特別驚異。內與俄出任調停。同託德國轉求奧國寬限時間。留作詳審之地。德僅允於四十八時滿後。再與奧磋商。德奧之先有成約。於此可見。各國因對塞國同以退讓之言進。塞國容納各國之志。於七月二十五日發表覆文。非常謙遜。惟對於第五款則云。奧匈所要求兩國會同辦理之件。但能與國際法不相衝突。塞國概當承認。關於第十款則云。以上各款。覆此文時。尙未實行。一俟議妥。即當出令施行。並謂如奧匈政府仍不滿意。塞國希望將此事交付海牙公斷。或交付與聞塞國一九〇九年三月三十一日宣言之各國公斷。奧國駐塞公使收到覆文。並未轉達本國政府。於十五分鐘後即請塞國發給護照。當晚下旗回國。由是奧塞兩國遂斷絕國交。

第四章 大戰之爆發

第一節 奧塞宣戰

奧塞於一九一四年（民國三年）七月二十五日斷絕國交。二十八日奧國向塞國宣戰。同日塞國亦向奧國宣戰。奧國宣戰理由。則謂塞國覆文絕無誠意。足見塞政府對於罪犯不肯改變其寬縱政策。奧國措詞雖欠圓滿。塞國覆文亦未免有延宕之心。大戰之責任。二國當共負之也。

第二節 德俄宣戰

俄國爲斯拉夫族中第一強國。對於素所扶持之同族小國。勢難漠置。塞既被兵。俄爲同種計。自不得不下動員令。以爲援塞之舉。德恐俄助塞。奧將不支。乃致電俄皇請中止動員。徐圖解決。俄以出兵防奧。不干德事。對德見事急。遂爲牽掣之計。於一九一四年八月一日對俄宣戰。八月三日俄國對德宣戰。

第二節 奧俄宣戰

七月二十五日俄曾致牒於奧。請將致塞通牒詳爲解釋。覆牒至。俄國頗不滿意。德俄已互發動員令。奧恐俄德戰起。牽動大局。因欲與俄國繼續談判。然事變過迫。德已與俄宣戰。而俄又以重兵臨奧邊境。奧遂於一九一四年八月六日對俄宣戰。八日俄國對奧宣戰。

第四節 德法宣戰

俄法爲同盟國。俄國被兵。法國援助。自係必然之事。當德俄戰機迫切之際。德曾致牒法國。謂俄國如加入戰爭。法國能否中立。法以惟利是圖。對德以法之勢必助俄也。乃爲先發制人之計。遂藉口法國侵犯其國界。於一九一四年八月四日對法宣戰。同日法國對德宣戰。

第五節 奧法宣戰

奧德爲同盟國。德既與法宣戰。奧國自應參加。因於一九一四年八月十二日對法宣戰。翌日法國對奧宣戰。

第六節 英德宣戰

一八三一年十一月十五日倫敦條約規定比利時爲永久中立國。英以比在普法兩大之間。頗以爲慮。因於一八七〇年八月九日締結英法條約。同年八月十日締結英普條約。謂兩國如侵犯比國中立。英國當以兵力援救之。一九一四年八月四日德國侵犯比國中立。英國爲名譽及威信起見。即於是日由駐德大使質問德外交總長是否尊重比國中立。德外交總長當答德之入比。實迫於莫已。若由他處進兵。曠日持久。俄國乘虛而入。德國危矣。英大使當警告德外交總長謂德國如決意侵犯比國中立。恐英德兩國所不願見之事。將由此發生。此時可否停止進兵。將軍隊撤回。德外交總長以萬難照辦對。繼續談判。迄無效果。英大使乃請發給護照下旗回國。英德絕交後。英國曾向德國致最後通牒。聲明德國已侵犯比國中立。英國有擔保之責。爲自防計。不得不加干涉。德國置之不理。英國乃於一九一四年八月五日對德宣戰。六日德國對英宣戰。英參戰後。一九〇八年之原締約國。遂於一九一四年九月四日復爲同盟。商定彼此不得單獨議和。

第七節 日德宣戰

英日同盟成立於一九〇二年。至一九一一年相繼續約二次。其盟約主旨。即互相保全兩國在東亞之領土及其他特別利益。所謂攻守同盟條款是也。英日因有同盟關係。英既對德宣戰。日本自不能作壁上觀。遂於一九一四年八月十七日向德國致最後通牒。提出左列條件。要求德國承認。

(一) 德國軍艦應立時退出日本及中國海面。其不能退出者。即行卸除武裝。